

06.10.2022.

Mladi najviše zainteresovani za digitalne vještine



Grad Goražde je po drugi put u posljednjih nekoliko godina domaćin sajma zapošljavanja. Ove godine se organizovao pod sloganom „Poslovi budućnosti“ i okupio je na jednom mjestu 14 poslodavaca i stotinjak tražilaca poslova, koji su zahvaljujući podršci Evropske unije i Međunarodne organizacije rada u BiH putem projekta "Podrška Evropske unije lokalnim partnerstvima za zapošljavanje - Faza II" (LEP II) dobili priliku da upoznaju jedni druge. Inče, kao i prvi put, sajam je organizovalo Lokalno partnerstvo za zapošljavanje BPK Goražde koje je jedno od 20 uspostavljenih partnerstava u okviru projekta LEP II.

Ernest Imamović, Gradonačelnik Goražda, je nakon svečanog otvaranja Sajma zapošljavanja iskazao zadovoljstvo zbog organizacije ovog Sajma i dodao: „Posebno se radujem prisustvu velikog broja poslodavaca na današnjem događaju. Ovo je prilika za kompanije da se predstave i da poput kompanije "TVC" d.o.o. putem našeg lokalnog partnerstva zaposle značajan broj neazposlenih osoba. Grad Goražde će učiniti sve da stvori pozitivan ambijent za poslodavce koji žele investirati u BPK Goražde.“

U okviru Sajma zapošljavanja, održana je i panel diskusija na temu "Novi pristup kreiranju radnih mesta", na kojoj je, između ostalog, bilo riječi o razvoju mehanizama za obrazovanje odraslih kroz povećanje saradnje između obrazovnih institucija i poslodavaca. Jedan od panelista, gđa. Biljana Begović, ministrica za obrazovanje, mlade, nauku, kulturu i sport BPK

Goražde, se posebno osvrnula na potrebu uvođenja karijernog savjetovanja, s ciljem pomoći u mapiranju vještina i sklonosti, te odabiru zanimanja. Posjetioci su također imali priliku čuti i inspirativne priče ljudi koji su samostalno započeli biznis, kao i koji su to izazovi i mogućnosti koje nude digitalne vještine.

„Mi smo dolaskom na današnji sajam željeli da motivišemo mlade ljude da ostanu u Goraždu i savladaju vještine modeliranja kojima se bavi naša kompanija, koja inače radi projekte za njemačko tržište. Mislim da smo u tome i uspjeli jer već imamo prijavljene četiri mlade osobe za obuku“ izjavio je Adnan Imamović, izvršni direktor kompanije "GEOBim 5D"

Današnji sajam je još jednom potvrdio da se samo partnerskim djelovanjem svih aktera na lokalnom nivou mogu poboljšati prilike za zapošljavanje i da lokalna partnerstva za zapošljavanje zaista djeluju.



